

Surat khabar: Utusan Sarawak ( Berita Perdana )

Hari/Tarikh: 3/10/2013

Muka surat: 5

Tajuk : IUFRO Bantu Kerajaan Capai Pengurusan Hutan Lestari.

# IUFRO bantu kerajaan capai pengurusan hutan lestari

KOTA SAMARAHAN, Rabu — Kesatuan Antarabangsa Pertubuhan Penyelidikan Perhutanan (IUFRO) komited untuk membantu kerajaan mencapai pengurusan hutan lestari.

Dekan Fakulti Sains Teknologi dan Sumber Universiti Malaysia Sarawak (UNIMAS) Profesor Dr Mohd Hasnain Md Hussain berkata, untuk itu penyelidikan dalam bidang perhutanan sentiasa giat dijalankan untuk mencapai matlamat itu.

Menurutnya, perkayuan yang sah dan pensijilan merupakan elemen penting bagi memastikan kemapanan hutan dan mengelak penebangan secara haram.

"Antara yang kita selidiki penebangan hutan secara teratur dan tersusun agar hutan yang ada di negara ini terus dapat dimapangkan," katanya.

Beliau berkata demikian ketika berucap di Majlis IUFRO, Sesi Pendidikan Sains Perhutanan Sempena Persidangan Keempat Pendidikan Sains dan Teknologi Antarabangsa 2013 di UNIMAS di sini hari ini.

Katanya, mana mana pihak tidak boleh menimbulkan propaganda berhubung pengurusan

hutan di negeri ini supaya tidak mempertikaikan niat dan tujuan usaha pemuliharaan tersebut dilaksanakan oleh kerajaan.

"Terdapat beberapa pertubuhan bukan kerajaan (NGO) luar negara yang mempertikaikan urus tadbir kawasan hutan di negeri ini namun kesemua langkah yang diambil adalah bertujuan mengimbangi kawasan hutan dan pembangunan di kawasan luar bandar," ujarnya.

Katanya, mereka boleh mempertikaikan dan tidak bersetuju dengan kaedah atau cara yang diambil namun mereka tidak boleh mempunyai prasangka negatif terhadap kerajaan negeri dalam memulihara alam semulajadi di negeri ini.

"Kita antara negara yang diiktiraf melindungi hutan, malah usaha yang dilakukan selama ini dalam melindungi khazanah hutan telah diiktiraf dunia," jelasnya.

Menurutnya lagi, kerajaan negeri juga komited apabila mengenakan syarat terhadap pengusaha pengusaha kayu balak supaya memiliki SFM sebagai usaha konservasi dan pemuliharaan hutan walau pun terdapat banyak halangan untuk melaksanakannya.